

四庫全書

史部

欽定四庫全書

欽定平定臺灣紀畧卷三十二

八月二十一日

丙辰

常青恒瑞同奏言外委段昭明

沈賢齋回奏摺隨同大兵前往諸羅至老店被賊
所害摺亦遺失又魏大斌等稟稱十二日夜接柴
大紀札云帶領之兵何哥抵諸羅我聞砲即帶兵
接應是以於十三日即帶兵二千七百名前行沿
途與賊打仗離諸羅尚有四五里我兵正與賊戰

之際忽大雨如傾道店湯圓店三坎店等處賊匪蜂擁而來約有二萬餘人圍困我兵不能施放鎗砲彼此鏖戰殺死多賊我兵奮勇力戰賊始敗走行近諸羅西門見有叅將潘韜遊擊李隆帶領兵民前來迎接所帶官兵內千總至兵丁傷有一千一百餘名現在雖抵諸羅仍被圍困等情臣等接閱之下不勝焦急伏思應援之兵內外訂期必須彼此熟商不悞時刻乃克有濟今魏大斌雖接柴

大紀來札有聞砲接應之語但定於某日某時此
從某道而往彼從某道而來亦當從容詳審今於
十二日夜接札即於十三日早前往而魏大斌等
起程在途之時正柴大紀在縣城禦賊之頃至午
後賊退柴大紀聞砲派隊往迎而魏大斌等已為
賊阻是雖曾預先關會而仍屬臨事愆期俟該鎮
將等將弁兵實在傷亡各數分晰報到另行查辦
惟是目前道路梗塞一切軍火糧餉不能運送諸

羅實關緊急臣等當又派副將蔡攀龍貴林叅將
孫全謀帶兵一千六百名仍由水道前往併諭令
既抵鹿仔草務必打通諸羅並與柴大紀等悉心
籌畫使往來道路不致再有阻塞並飛飭前後調
往各鎮將官兵悉聽提臣柴大紀調遣則意見無
所參差必可尅期集事至臣等軍營新添本省兵
二千潮州兵二千而總計派往諸羅各兵已有七千名
即日打通諸羅之後該處亦須分兵堵剿是業經

派往之兵不能調回郡城臣等軍營兵力依然不足仰懇或於江西廣西兩省各撥兵三千臣等並不專候此六千兵到營方圖進剿惟俟現今浙粵滿兵三千以及粵省綠營兵二千到齊即相機前進再查臺灣府城義民協同官兵守城殺賊應行嘉獎但臣等體訪南北路義民情形各有不同則獎賞未能一例如諸羅之黃奠邦等鹿仔港之林湊等北淡水之黃世恭等南淡水山猪毛之周敷

紀等各統率手下數百人一二千人不等自可將
統率之數人按其勞績分別嘉獎惟府城內外原
係市廛之地尤多服教慕義之人上年十二月間
賊來犯郡同時倡率各帶手下數十人向前守禦
者竟有三百餘人彼此不相統率其出力見功亦
大畧相等當飭臺灣道確查共三百四十四名臣
等酌量人數若賞概從優轉恐無以示勸而賞或
弗及又非所以示公今將武舉給以五品職銜武

生給以六品職銜廩生生員貢監給以八品職銜
民人俱賞給金頂卹等如願隨營打仗俟有功另
請加獎其諸羅鹿仔港北淡水等處義民俟查取
履歷功績覆到即行獎賞奏入

上命軍機大臣傳諭福康安常青李侍堯藍元枚柴大
紀曰魏大斌殺散賊匪前抵諸羅而一切軍火糧餉
仍不能運送入城道路梗阻是不惟柴大紀被圍而
魏大斌又在賊圍之中常青等接到稟報自即應親

統大兵徑赴諸羅打通道路接應柴大紀方可得力
乃僅添派蔡攀龍等帶兵一千六百名前往援應似
此零星派撥何益於事不又似魏大斌乎況柴大紀
處被圍日久其勢甚為急迫常青於此時尚不親往
救援則豈擁此重兵徒以株守府城營盤為事耶且
常青即或因肘腋堪虞未能遽離府城亦應帶兵就
近先將南路屯佔賊匪廓清剿殺前據常青等奏南
潭賊匪被官兵追殺將賊人草屋蓬寮燒燬竹箐砍

伐賊匪紛竄則南路賊夥已有潰散之勢正應乘機
剿捕擒拿莊大田使南路肅清以便直趨北路可無
後顧之虞今據所奏情形則是南路賊匪尚在窺伺
而常青又並未領兵前往攻剿即云連日風雨未能
進兵但官兵處遇有風雨豈賊匪獨無風雨耶况官
兵遇雨即鎗砲不能施放而弓箭刀矛獨不可用以
殺賊耶常青等何以株守無策若此為令之計常青
處添調官兵早已齊集竟應留恒瑞駐守府城營盤

常青速統大兵直抵諸羅藍元枚若已由大肚溪進兵與徐鼎士訂期夾擊固屬甚善否亦即直赴諸羅會合常青柴大紀則得二三萬大兵全力奮勇剿殺進搗賊巢擒拿賊首賊目庶可期迅速集事至川省屯練降番前已有旨派調二千人該處兵丁自勝江西廣西遠甚是二千人足抵二萬人之用尤可資以殺賊但屯練降番到彼尚須時日常青此時不可坐待惟應就現在添調已到之兵迅速帶往會合進剿

毋得再事因循致蹈黃仕簡等覆轍自干重戾至福
康安在途已兩次啟閱常青李侍堯奏摺該處情形
諒已明悉自必定有主見此時當趲程前往愈加緊
急行走於抵廈門後毋庸等候屯練兵到竟先帶同
巴圖魯侍衛等星速前渡臺灣即統領該處官兵徑
赴諸羅會合常青藍元枚柴大紀搗穴擒渠痛加剿
殺以期迅奏膚功

二十二日

丁巳

上命軍機大臣傳諭阿桂福康安常青李侍堯藍元枚
柴大紀曰昨據常青等奏派兵接應諸羅一摺反復
思之常青等辦理此事實屬毫無定見一籌莫展既
不能舍南趨北又不分一人將南路之賊乘勢殲除
徒擁多兵株守郡城而摺內尚稱旬日有餘賊黨知
官兵有備不敢來犯豈賊不來犯常青即以為萬幸
不思進攻似此與賊相持畧無展布豈在臺灣坐守
終老即能了事乎常青何並未計及止請於江西廣

西添調官兵試思江西廣西之兵與浙江之兵相等
豈能得力而江西兵尤為綠營中之最無用者若以
此等無用之兵付爾等無用之人徒以虛糜糧餉輕
試賊鋒而常青又於各處東派西撥於事更屬無益
且常青既不北應諸羅又不南剿賊匪究係意欲何
為從前黃仕簡株守郡城猶得藉口兵少力單不敷
剿捕今常青原帶之兵已較黃仕簡在彼時為多又
經陸續添調閩省及粵東浙江綠營駐防兵共計不

下二萬兵力如此厚集而復何所藉口常青可不勉
圖進取稍贖前愆耶至福康安已屢經有旨令其趲
程行走一抵廈門不必等候屯練兵到即帶領已圖
魯侍衛等速渡臺灣督率進剿彼時常青處添調各
兵早已齊集又有已圖魯侍衛等百餘人派令帶兵
自必軍威倍壯壁壘一新福康安竟當直抵諸羅會
合藍元枚柴大紀等直搗賊巢擒拿賊首賊目以期
迅速集事常青究係年老留於軍營亦屬無益且軍

中有將軍二人恐事權不一將弁無所稟承轉多未
便福康安到後察看情形如有必須留彼幫辦之處
即令常青留於軍營亦可若留彼無用即當令其來
京陛見總在福康安酌量而行但朕意究以常青可
不必留在該處也至恒瑞年力精壯應仍留於軍營
聽候調遣福康安帶有欽差關防即以欽差辦理將
軍事務其常青所帶福州將軍印信仍著交與恒瑞
可也

二十三日戊午常青恒瑞同奏言自七月二十六七

八九等日颶風霖雨至八月初一日風雨稍息臣

等預揣賊人詭計必乘雨後鎗砲潮濕又來攻犯

先於初二日夜密令那穆素里往探賊人動靜即

派總兵梁朝桂協領海星阿帶兵四百名往正南

十三里莊巡哨又派侍衛郭爾敏色遊擊雙德帶

兵四百名往南勢莊巡哨派侍衛雅爾疆阿協領

色普星額帶兵四百名往檳榔宅巡哨派岱森寶

富克精額他思哈副將丁朝雄等帶兵八百名分
巡白崙仔虎仔山兩處至初三日辰刻有賊三四
千四路前來臣等帶領中隊迎擊各路巡哨官兵
爭先邀截鎗砲齊放賊人抵死抗拒臣等預派下
之翼長烏什哈達官福侍衛希明帶滿漢官兵一
千并山猪毛義民千餘從沙崗抄出賊人望見膽
怯紛紛逃竄官兵追殺鎗砲斃賊約二三百人至
未刻因泥濘收軍初四日接據提臣柴大紀稟稱

賊匪於十五二十一二十三並本日疊攻縣城均
經官兵義民奮勇殺退第諸羅被圍兩月糧餉鉛
藥一切匱乏外莊之民迫於賊勢粒米不得到縣
新到之兵其氣甫挫一時不能出剿舊存之兵為
數無多只堪力守又二十七日匪衆萬餘復攻縣
城同將弁兵民分頭抵禦施放大砲接連轟擊匪
勢稍阻隨分撥將弁各帶隊伍義民追殺自卯至
午打死逆匪數百人值風雨收軍察看情形逆黨

恃衆分劄各莊有必陷諸羅之意又匪黨分屯各
莊大出金帛豎旗招人無賴之徒蟻附益衆而孤
城坐困深可憂慮就地煮硝製藥所得無幾且米
穀一項日見空乏又自二十八日至今連日大風
霖雨賊匪仍屯各莊開霽必復攻縣日與代理縣
陳良翼設法米糧煎煮硝藥以期力守但煎硝實
不敷用兩次飛咨藍元枚發兵救援接到回札並
未提及有無救援之處合再馳稟星刻發兵仍一

面飛咨藍元枚尅日起兵由船至笨港來諸羅夾攻
再賊匪鵠張務求迅調閩浙兩省兵一萬名來臺
灣以便剿洗各等情是諸羅望援甚殷但臣等又
派蔡攀龍等帶兵一千六百名前往該提臣等尚
未得信計筭一二日內自可前抵鹿仔草一面飭
令道府預撥糧餉鉛藥妥速運赴鹽水港轉運接
濟一面飛咨叅贊藍元枚現有添撥漳州兵二千
名約計已到鹿仔港務即於該處酌撥一二千名

派令將弁帶領即由笨港星赴諸羅自可訂期夾
功并力打通至臣等軍營官兵於六七月間受濕
染病者頗多自祭關帝廳以後目下病皆漸愈除
前後派赴諸羅兵七千現計軍營兵數除病者不
過四千餘名然剿賊並皆奮勇泥水亦不少怯不
日溪水稍涸添調粵浙之滿漢兵亦接續到來即
無難盡殲匪逆

同日李侍堯奏言本月初七八日連接常青抄寄

摺稿知其又遣蔡攀龍帶兵前往諸羅救應而蔡攀龍是否已到尚無信息常青仍復坐守軍營並未親往設法解圍是真不知緩急實不可解就現在臺地情形而論自當以先救諸羅為第一要務常青摺內稱柴大紀咨請藍元枚由笨港赴救等語查藍元枚處臣所調之漳兵二千久已開洋雖七月下旬海多大風而日內料已全到其分往鹿仔港之粵兵二千已先有五百前往今續到之一

千五百亦已登舟又續調之粵兵一千亦到四百而領兵之總兵李化龍又已先到現催該鎮帶此已到之兵即日開駕再三面囑該鎮務與藍元枚奮勇進攻不可再有觀望此亦赴援解圍之一路至臣於閩省多行召募原以備續調之用惟尚未操練嫻熟難於驟調然既有新兵及時訓練以實營伍即可將舊兵挑出進剿而新兵內有兵家子弟已能演習適用者亦可參用是以臣一面將泉

州等處酌量新舊兼挑湊足三千名派委大員統領配渡徑向鹽水港進發以免紆折此又赴援解圍之一路但未知諸羅之力是否尚能久待至常青摺內有增調江西廣西兵各三千之請而聲叙柴大紀咨文又有增兵一萬之請雖覺跡涉張皇然看來亦不得不再為接濟與其零星續派自不如儘用大力以期一舉撲滅之功查江西贛州素稱強勁且距閩省路亦近便粵西之兵亦尚可用

如照常青所請之數調派三千前來合之臣此次
續調之閩兵三千則兵力亦已壯盛惟是統兵全
恃主帥常青措置錯謬看來竟不能完結此事仰
懇或如臣前所奏竟令海蘭察前來統領調度庶
不至再有貽誤至沿海各口岸恐有臺匪潛入勾
結等事固須嚴密查拿若販貨商船則正藉其流
通百物自當倍加體卹使其所至如歸商船載有
貨物非偷渡之船專載男婦者可比本屬易於識

別臣自二三月間即飭各口岸凡遇入口船隻不載貨而但載人者必須盤詰現已獲有數起訊係避難逃歸原籍之人俱有親族隣里保認當即令其領回安插不許稍有擾累至於商船俱有本灣甲長認識其出口時但須掛號即行開駕及進口時載有貨物俱有投稅起貨查自春間以來尚無留難悞拿等事均奏入

上命軍機大臣傳諭福康安常青李侍堯藍元枚曰常

青初到臺灣尚有振作之氣及不能取勝又見賊多
竟致一籌莫展難望其力圖振作此事惟仗福康安
迅速到彼督率籌辦以期壁壘一新及早藏事福康
安抵廈門後務即遵照前旨統領大兵直抵諸羅會
同藍元枚柴大紀合兵進剿不可過於持重若福康
安亦如此恇怯豈不失朕所望乎總之賊夥雖多不
過脅從烏合易聚易散止須將其渠魁擒戮夥匪自
必聞風瓦解彼時相機酌辦或剿或撫自無難迅速

集事若如常青零星派撥分投堵禦徒使師老力疲
毫無寸進轉與賊人以暇俾得肆其狡計惟知奏請
添兵豈賊有二三十萬亦將以二三十萬官兵應之
有是理乎況如常青所辦即再添多兵亦不過東派
西撥仍屬不敷豈能添兵不已乎從前伊犁金川等
處皆係番回部落其人豈止百萬大兵所臨無不摧
破克捷掃穴犁庭悉就平定況臺灣本屬內地林蕪
文等不過么麼小醜乘間竊發以如許兵力而賊首

尚日久稽誅更復成何事體耶福康安務須胸有定見不可稍事游移此為最要并著福康安查明常青因何株守府城既不帶兵剿殺南路賊匪又不北往將沿途之賊悉力剿除前抵諸羅僅派將弁等由水路前往諸羅接應即該處有不能移動之勢何以不將實在情形陳奏之處逐一詢問常青令其明白登答據實覆奏至李侍堯駐劄廈門聞見自必真切乃并未將常青年老無用辦理竭蹶情形據實陳奏經

朕降旨詢問尚以常青處事明白可無庸另派更換
試思常青近日所辦之事尚能望其辦理完結乎看
來李侍堯惟恐奏明常青於剿捕事宜不能得力必
派伊前往臺灣接辦是以含糊其詞不肯直奏此等
處亦不能逃朕洞鑒其實李侍堯於地方軍情辦理
尚妥而軍旅素未嫻習石峯堡覆轍不遠即往臺灣
與常青無異朕亦斷不派伊前往也本日常青等奏
派兵搜剿打仗并接據諸羅文報情形一摺所辦總

不成事體柴大紀處賊匪糾衆數萬連日攻圍城中
糧餉火藥俱屬不敷其勢甚屬急迫總因常青節次
所派魏大斌蔡攀龍等不過帶兵千餘名零星調往
策應既不足以資攻剿而火藥鉛彈糧餉被賊截斷
城中徒增喫用之人愈形拮据實為失策今常青處
無兵可派據奏札令藍元枚撥兵一二千援應諸羅
藍元枚處已屢經有旨令其親自帶兵前往諸羅會
合攻剿自早已接奉何尚未據覆奏且柴大紀兩次

飛咨發兵救援藍元枚何以並未發兵著即明白回
奏現在諸羅被圍緊急藍元枚若能進兵大肚溪與
徐鼎士夾攻大里代賊巢使林爽文回顧巢穴有所
牽綴則圍困諸羅之賊自當漸就解散柴大紀可以
捍衛無虞亦是一策若未能前進藍元枚亟應親統
官兵速赴諸羅接應柴大紀毋得稍有遲緩此事總
由常青因循貽誤株守無策所致雖據奏稱存營之
兵止有四千未能前赴北路但現在添調之兵計月

內早已齊集更無可藉口常青若能先將南路賊匪
悉力殲除賊目莊大田拿獲固可稍贖前愆否則速
統大兵乘其新到銳氣直趨北路前抵諸羅亦尚可
補過即屬常青之福若惟知株守郡城坐視柴大紀
被賊圍困致有疎虞則是常青罪上加罪恐不能當
此重戾也至江西兵在綠營中最為無用朕所素悉
即該省鎮將大員向亦祇將才具中平者酌量簡用
兵丁僅可防守營汛若用以剿賊徒令虛糜兵餉輕

試賊鋒斷難得力即粵西兵亦屬平常前據福康安奏調川省屯練兵二千朕初意續得捷音尚應停調今看此情勢難中止現據鄂輝統領前進矣此二千兵最為趨捷已足當二萬之用而續調閩兵三千即可抵粵西江西兵六千是兵力不為不厚福康安到廈門後倘常青等尚未能進抵諸羅而諸羅或有挫失福康安即當在廈門暫駐俟屯練兵到齊軍威壯盛再帶領巴圖魯侍衛等前渡臺灣相機籌辦方

為妥善或於巴圖魯中先發去四五十亦可備目下
攻剿之用再魏大斌前因其帶兵援應柴大紀殺退
賊匪直抵諸羅尚為奮勉是以降旨賞戴花翎今據
常青等節次奏到情形是魏大斌竟係在鹿仔草被
賊將糧餉火藥等項攔截難以復回只得前赴諸羅
希圖掩飾且所帶兵一千五百名被賊殺傷一千一
百名是魏大斌竟屬有過無功著福康安於到彼後
切實查明如魏大斌實係殺透重圍直抵諸羅尚能

奮勇殺賊自應仍賞戴花翎若伊係因糧餉等項被賊截斷始行前赴諸羅而兵丁又傷亡過半即據實叅奏李侍堯駐劄廈門聞見自確併著將此情節一併查明具奏又昨據常青奏派令蔡攀龍等由海道前往諸羅援應似由府城至諸羅之陸路已被賊人梗阻而所接柴大紀咨報稱外委段昭明沈賢齋摺隨同大兵行走至老店被賊所害摺亦遺失之語則又似往來奏摺俱由陸路齎遞現在發往柴大紀文

報究係於何路行走且段昭明等齎回之摺既有遺失而節次發給柴大紀諭旨總未見覆奏恐亦不免有在途遺失之事若被賊人檢得賊衆內不乏識字之人轉可得知官兵虛實關係緊要此等軍情要務常青李侍堯等何以並未想到查辦及此此後所發柴大紀文報若由臺灣府城齎遞即交常青專差奮勇弁兵遞送若由鹿仔港一路齎遞即交藍元枚專差奮勇弁兵齎遞毋致稍有遺失遲悞此次發交柴

大紀諭旨即著交李侍堯照此辦理並著常青李侍堯將前此所發柴大紀諭旨奏摺有無遺失是否俱行遞到之處一併查明覆奏

同日鄂輝保寧成德同奏言川省屯練降番前經調赴甘省剿捕逆回辦理已有章程此次仍應照辦臣等即專委三標中軍馳赴雜谷新疆會同該管將領檢派屯練一千六百名降番四百名均挑選曾經打仗壯健之人並派得力土弁木塔爾日朋

丹巴西拉布等帶領星赴成都臣等親為點驗優
加賞賚令其迅速進行並調素經行陣曾帶番兵
之將備八員率同勇幹千把分起管領查屯練原
係維州協專屬該協副將那蘇圖屢經出師人亦
明白勇往現令與懋功協副將張芝元一同管領
惟是番衆二千道經數省必得統領大員以資總
理松潘鎮總兵穆克登阿熟悉軍旅才識幹練現
派令統率前往方資鎮撫至自成都由水路至重

慶需用內江船隻查現在上潯各屬兩次趕辦米石俱已運竣足敷僱用惟自重慶至楚船隻除前運米二十萬石已掃數開行外其續運米三十萬石現亦接續兌運節經臣保寧設法催備船隻雖可無缺恐一時難得餘船再副軍行臣等現復嚴飭原委辦船之文武各員將下游川船速行趕赴重慶供載倘番練等行至重慶尚無多餘船隻即將復運三十萬石尾幫之船暫停運米先儘兵行

再將續到之船隨後運米亦不致守候稽延至沿途一切供支臣等飛飭水陸地方預備夫馬及鹽茶米麪肉食柴斤等項寬裕應付奏入報

聞

欽定平定臺灣紀畧卷三十二

欽定四庫全書

欽定平定臺灣紀畧卷三十三

八月二十四日已未福康安奏言拆閱常青等所奏

摺內僅稱賊匪旬餘未敢來犯郡城並不能直前進勦是南北兩路官兵尚未得手常青親在臺灣較李侍堯據屬員稟報之詞自為確切所稱兵力不足似屬實在情形林爽文自上年滋事以來陸續徵調各省滿漢官兵不為不多何以閱時已久尚

不能掃穴擒渠揆厥所由固屬該將軍等零星堵禦以致兵分力薄亦因久未藏功士氣日形懦怯現在雖有添調之浙省粵省官兵陸續配渡前往第該兵丁等向未出征恐不能十分得力前據李侍堯奏請先將內地各營存兵內派撥即令新兵充補但閩省各營兵丁挑赴臺灣者已多存營之兵諒非精壯且閩省地方山海交錯在在需兵汛防彈壓此時若將內地兵丁調往而概以新兵充

補亦屬非計必須增調得力兵丁乘其初到銳氣
痛加勦殺賊匪見官兵日益增多自必心存畏懼
黨羽漸離渠魁更易就獲今該將軍等又以郡城
兵單奏請添調廣西江西兵六千名但前奉

諭旨令貴州湖北湖南等省各挑兵二千名聽候檄調
此時自己預備齊全查貴州兵丁屢經行陣在綠
營中最为勇捷湖廣地方與閩省一水可通與其
另調他省莫若仍將貴州湖廣未調之兵即令分

起啟程較為安速至四川屯練降番派撥二千名
速行赴閬此項屯練兵丁想已行走在途將來前
抵軍營較他省更為迅速若復中途停止未免徒
勞往返况臺灣地方多係深林密箐屯練兵丁登
山趨捷用以搜捕匪犯必能得力仰懇仍准其調
發臣惟恐緩不濟急一面咨會保寧飛催前進再
魏大斌赴援諸羅中途被賊圍截雖據稱賊衆二
萬猝至又適遇大雨不能施放鎗砲彼此鏖戰殺

死多賊仍遺失兵一千一百餘名等語但綠營往往有謊報惡習魏大斌是否張大其詞以掩其遺失多兵之咎而此項損失之兵有無潰散從賊之處均須徹底查究容抵臺灣後再行查明核辦至柴大紀力捍孤城坐困已及兩月現在賊匪鳩張更甚城中存兵無多火藥糧餉又已匱乏設有疎虞所關匪細雖據常青等派令蔡攀龍等帶兵一千六百名前往但尚未得有到彼信息且所帶兵

力無多賊勢正在猖獗恐難即時進剿竊思南路賊匪屢經官兵搜捕賊勢漸衰此時郡城一帶較之諸羅被困情形不甚著重自應令常青舍南趨北於郡城各營迅發多兵前往援救但賊人狡計百出若見大兵全集諸羅又恐乘虛在郡城滋擾郡城為全臺根本重地若留兵過少不足以備勦捕應援之兵臣通盤籌畫所有現在請調各省官兵懇飭各督撫速行派撥趕緊赴閩聽候調用再

臺灣不產馬匹向來俱由內地帶往此次巴圖魯侍衛等前往進勦帶兵打仗追拿賊匪必須乘騎馬匹方能得力已札知李侍堯速行備馬二三百匹先期派員送往臺灣應用

同日孫士毅奏言臺灣地處海中深秋後早晚寒冷棉衣在所必需凡先後赴臺兵丁似應各給一件至衫袴鷄鞋等項先調之四千名到臺已閱數月領兵鎮將目擊將次破爛自應製備解往其續

調之七千名甫經赴閩係屬完好毋庸一體添給
查鷄鞋套袴軍裝內例應製備准在各營公費項
下開銷其棉衣及貼身衫袴應由各營家屬自備
官為解送第該兵不能盡有家室若令自行備辦
恐遲速不齊有無不一其中難免向隅查出征將
弁兵丁例有賞借二項其兵丁項下馬兵賞銀十
兩借銀十兩步兵賞銀六兩借銀六兩此次派撥
赴臺勦匪近在隣省非比出口大舉臣意止應照

例准借凱旋後分年扣還其賞銀一項應俟到軍
前奮勇勦賊聽候將軍叅贊隨時酌賞以示鼓勵
若槩於起程時照例賞給轉使勇怯不分不足以
昭激勸臣是以止辦准借一項至此次派出馬兵
因地隔重洋並未攜帶馬匹現係一律步行臣於
各兵起身時普照步守兵准借六兩之例每兵先
借銀三兩使不致任意花消扣存三兩官為製辦
棉衣衫袴核計尚有餘剩本係該兵等應借之項

臣即咨明閩省准其稟知領兵鎮將就近請借為軍營添補之用再鷄鞋套褲已據各本營陸續解送到潮其棉衣一項連餘丁共須一萬二千餘件臣就近在潮飭令地方官備料鳩工並經潮州鎮臣彭承堯多派營匠趕緊督辦不日即可完竣除現在後起赴閩兵丁已令隨身攜帶外其餘解交廈門同知衙門附便搭解軍營按名散給又接據梁朝桂等稟稱逆匪潰逃之後將備督率追捕必

資馬力請於附近潮州各營借撥一百匹解往乘
騎查將備起程時只預支三月養廉按月坐扣其
應借治裝銀兩凱旋後分年扣還一項未經具領
應請即於此內扣出馬價交各營買補等語臣查
粵兵先後赴臺灣一萬一千名所有領兵官自總
兵至將備共數十員今請給馬一百匹畧有浮多
然臺灣地屬崎嶇馬力易乏似應寬給數匹俾資
追捕已如所請令官兵陸續順帶過臺其官員應

借治裝銀兩臣現咨詢閩省畫一辦理至駐防領
兵官員現按照品級隨帶馬匹其棉衣一項詢之
副都統博清額據稱現交秋令各兵均已備帶毋
庸另製再現在正值勦匪緊要之時兵數既多火
藥尤宜寬裕臣先期飭備復經潮州鎮臣彭承堯
在本營加緊配製又於額外趕備火藥四萬斤即
隨此次官兵之後接續運閩計兵丁隨身攜帶及
三次委員額外運送共火藥二十萬斤均在粵省

年額之外內十萬斤係額外辦出尚有十萬斤係
於預備三年火藥內抽撥解往臣嚴飭藩司許祖
京務須剋期採辦硝磺分給各標營即日領回配
製前接閩省撫臣來札借用粵東火藥將來製就
解還臣思閩粵同一辦公無分畛域况閩省現在
用兵正須火藥應用粵東撥解之項即可在粵配
製報銷無庸閩省解還徒糜運腳至駐防兵一千
五百名分作四起經撫臣添派臬司姚棻運司德

爾炳阿肇羅道阿彰阿送至惠州老隆一帶地方
副都統博清額自省統領行走於七月二十五六
七八等日齊入閩境其續調綠營兵六千名內除
四千五百名蚤經配渡到臺外尚有在滿兵後接
續前進一千五百名臣本定期於七月二十九三
十日點送出境內有順德新會營兵四百名遲到
兩日於八月初二日纔到黃岡當即點送入閩又
欽奉

諭旨添調一千名八月初三日先點四百名出境其餘
六百名計程極遲八月初五六等日必到閩省詔
安縣境今於初六初八兩日纔到黃岡亦即同點
送出境查順德新會及羅定營兵俱遲到數日臣
會同提臣高瑑傳齊衆兵分將領兵備弁各加重
責使凜遵紀律不致稍有遲誤計該兵等到閩配
船東渡如風色較順此最後之一千名亦可於八
月二十前齊赴軍營再商民挾貲營運利於迅速

往來本年因臺匪滋事商船不免心存疑畏已覺
此前稀少若再盤詰過嚴必致聞風裹足商販不
通百貨騰貴即閭閻隱受其害是以臣嚴諭守口
弁員如將毫無可疑之客船槩行留難盤問立即
據實叅革重治其罪現在入口商船視春間較多
從此轉可暗中物色良歹設法偵探是一任商船
往來無阻於稽查奸匪尤為有益至南路賊匪尚
未十分懲創何至忽爾紛紛逃竄北路梗塞雖通

然賊匪鬼域多端其中恐有別情未可深恃且又
聞逆匪林爽文將無食貧民招入賊巢挑取年壯
者厚給衣食教以技勇抗拒官兵其怯弱者盡數
趕出聽其所之以免養活無用之人其奸惡至此
臣每向粵省帶兵將備論及鎗砲為行軍利器固
須演放純熟然聞逆賊近因官兵鎗砲利害不能
抵禦竟敢練出一夥亡命奸徒伏在賊匪隊內抵
死直犯我兵倘不預為整備恐臨時轉致喫虧必

須於鎗手後緊接短兵如賊匪已在百步之內即令短兵直前撲殺有反顧者將兵從後砍之如此痛勦一兩陣殺賊數千賊無計可施當成瓦解之勢再臣聞賊匪最短火藥蓄心搶奪我兵存貯火藥處所尤宜防護又聞林興文胞弟為鎮臣柴大紀用砲擊斃莊大田之子為人割取首級出獻未知是否確實再部議將粵海關五十二年分應徵稅銀撥運二十萬兩解閩備用已移知廣東撫臣

圖薩布會同監督臣佛寧撥出迅速委員眼同彈
兌裝鞘運交閩浙督臣李侍堯存貯入於軍需項
下備用均奏入

上命軍機大臣傳諭福康安常青李侍堯藍元枚曰前
因常青等辦理勦捕事宜怯懦因循茫無定見是以
特派福康安前往更換督辦軍務福康安非常青可
比朕方倚以集事今閱奏到之摺看來福康安竟不
免為常青所惑畧有畏難之意福康安雖更事未久

但軍旅之事屢曾經寧不知臺灣賊匪止係烏合之衆夥黨雖多易聚亦復易散惟在殲其渠魁則脅從當不攻自破現在常青處兵力雖經零星派撥止存現兵四千名但添調之浙粵駐防綠營兵五千名業經陸續配渡又經李侍堯於閩省泉州各營派撥兵三千名早應接續到彼加以川省屯練兵二千名昨已令鄂輝帶領星速前往是添調之兵不為不多况福康安帶領巴圖魯侍衛等百餘人皆屬屢經行

陣趨捷可用以如許兵力而又得奮勇帶兵之人更何必於此時先為鰓鰓過計乎且用兵之道全在乎將如運籌制勝得宜原可以少擊衆斷無賊有一二十萬即須以官兵一二十萬應之之理若以一兵當一賊即再調多兵亦屬不足豈有添兵不已之理乎現在賊匪以全力圍攻諸羅其勢甚重福康安到彼自應統領大兵徑趨北路打通道路聯絡聲勢會合進勦方可使軍威振作壁壘一新鼓勇直前令賊人

望風奔潰若先存瞻前顧後之見何以集事况就福康安所慮如恐大兵往北賊人乘虛滋擾郡城試思賊匪等如由諸羅一路攻擾郡城則賊人來路即福康安常青等北去之路正可迎頭截殺賊人焉能逼近郡城若慮賊從間道山徑潛出滋擾我兵豈不可堵其出路若慮南路之賊攻擾郡城則常青在彼數月添兵未及到齊尚能保守無虞豈福康安與海蘭察等同往各路增調之兵萬餘又已到齊且有巴圖

魯侍衛等百餘人轉慮其乘虛滋擾之理即使常青
於福康安未到之前業已帶兵前赴北路而郡城營
盤尚有恒瑞帶兵駐守豈不足以捍禦福康安又何
所顧慮而先存畏怯之意甚不滿朕所望矣至常青
摺內所稱柴大紀請添兵一萬之語自因柴大紀被
賊攻圍兩月道路阻塞文報不通於陸續添調各省
之兵共計一萬六七千名之處並未得有信息又因
被困甚急不無惶怯是以有添兵一萬之請今福康

安已知添調多兵正當乘其銳氣及鋒而用一振從前萎靡畏葸之習乃於途次即已奏請添兵轉比常青奏請之數較多豈非畏難多慮乎福康安身為統帥軍中俱視其意嚮若福康安先有示怯之意則以下將弁等更必心存懦怯士氣豈能振奮耶況即如請添調貴州湖廣等兵亦非指日可到必須兩月之久方能到彼諸羅稍有意外之虞已屬緩不濟急於現在勦捕援應機宜有何裨益耶福康安務須堅持

定見曾有成算相機妥辦不可稍涉游移若福康安亦不免畏難過慮朕又將何所倚恃總之此事全在得其竅要決機制勝以期鼓勇直前朕廼念軍務早已通盤籌畫今不妨為福康安明白宣示使之安心若此時常青等勦捕得有轉機早晚捷音奏至即前此調備之黔楚兵竟當停止徵調福康安自應速渡臺灣督兵奮勦萬一常青等仍前株守諸羅勢竟不支甚或至臺灣全郡搖動則其事必須大辦且將調

用京兵及各省兵并不止於調派貴州湖廣之兵而
已朕豈大意不審事體之人然以天理人情論之未
必至此決裂福康安不必先事畏懼也彼時自應令
福康安駐劄廈門俟大兵齊集再圖進取必不令福
康安止帶屯練兵二千冒昧前進何必於此時先存
疑難畏怯之見乎福康安接奉此旨更當安心鎮定
勉圖剋捷毋負朕委任之意再現在臺灣勦捕賊匪
添兵甚多將來進攻大里杙賊巢尤須用砲轟擊火

藥鉛彈最關緊要且賊人此時所搶火藥漸已用盡
若運送軍營時或被賊人乘間邀截搶奪貽誤非細
著常青李侍堯藍元枚等務須加派弁兵小心押運
加意防範倘稍有疎虞惟伊等是問

同日李慶榮奏言黔省原有挑備戰兵二萬名平
日勤加訓練以備調遣今接奉

諭旨隨密飭各標營即於戰兵內復加挑選擇其勁勇
出色者如數預備並飛咨督臣富綱暨提臣保成

將曾經行陣奮勇幹練之將備公同揀派令其帶領管束至黔省軍裝向俱整齊火藥亦屬充裕一俟續奉

諭旨或福康安檄調文書到日即可分起迅速前進奏
入報

聞

二十五日

庚申

上命軍機大臣傳諭福康安曰昨據福康安奏稱添派

官兵一摺已降旨詳悉開導指示今反覆思之竟至徹夜不能成寐福康安受恩多年最為深重非他人可比因其才具歷練是以特令前往臺灣督辦軍務前福康安陛辭之時朕曾經詳悉面諭福康安由驛前往如途次啟閱常青等奏報勦捕事宜辦理得手已與藍元枚柴大紀會同即應迅渡臺灣督同進剿倘常青柴大紀或不能得勝而臺灣全郡竟有意外之虞福康安自應駐劄廈門等候官兵調齊再渡臺

灣相機妥辦所諭機宜至為明晰朕臨御五十餘年
於一切重大事務經歷不知凡幾無不通盤籌畫熟
慮機先今委福康安以勦捕之任豈有令其冒險前
進之理無論福康安久經簡任寄以股肱心膂事無
鉅細無不休戚相關斷不肯置伊於險地即常青藍
元枚柴大紀等身歷戎行皆係為國家出力亦皆體
恤周至圖其萬全下至蔡攀龍徐鼎士及大小將弁
朕亦無不時加軫念弗令陟險豈有福康安為朕所

親信倚任之人轉不為之計出萬全耶福康安非不
曉事者何至不能仰體朕意忘朕面諭之語轉為常
青等奏摺所惑耶況朕即不為福康安一身之計寧
不為朕一身國家軍旅重務熟思籌畫耶朕屢念軍
務早夜思維揆之天理則朕子惠黎元於臺灣百姓
一視同仁並無額外徵求之事而以人事言之則林
興文以無藉細民負嵎蟻聚止係么廝小醜即云不
肖官吏貪黷斂怨亦俱被伊戕害且肆其荼毒地方

良民受害者更復不少實為覆載所不容亦斷無不
速就撲滅之理福康安於金川軍旅大事亦曾經練
豈轉於此等么麼小醜竟至委靡不振耶況我國家
荷蒙

上蒼眷佑軍興之際即偶遇危難無不轉敗為功如從
前兆惠之在錫箔阿桂於木果木溫福挫失之後亦
曾屢經危險旋俱克成大勲況回部金川本其部落
用兵撻伐猶不無戰勝闡土之心至臺灣本屬內地

林典文止係編氓適以自取其死臨以大兵有不如
摧枯拉朽速就殄滅者乎且柴大紀現在雖被賊匪
攻圍勢在急迫而常青業已派委蔡攀龍帶兵往援
柴大紀蔡攀龍素為賊所畏憚亦皆奮勇可恃日內
常青接奉前旨若即舍南趨北諸羅自己解圍軍威
振作捷音踵至亦未可定福康安何必遽請添調多
兵為此徒亂人意之舉乎且福康安於清江地方發
摺距廈門甚遠豈能一蹴而至途中自必續接常青

等奏報即使諸羅勢將不支必須增添兵力常青已
經具奏福康安原可駐劄廈門等候官兵齊集再渡
臺灣相機督勦況續添滿漢官兵正在到齊軍威增
壯更可無慮福康安此時前抵廈門尚需時日又何
必預存畏難過慮之見耶從前康熙年間奸民朱一
貴糾衆滋事臺灣全郡俱陷經總督滿保派令藍廷
珍以一總兵帶兵前往即能剋期撲滅況現在派如
許重兵有福康安等帶同巴圖魯侍衛督率進勦又

何難迅奏膚功蓋此等刁悍匪徒一時蟻聚緩則彼此相助急則彼此相圖無論林爽文等罪惡貫盈斷無不立遭誅殛即為萬一之慮逆匪等竟將臺灣全郡搶佔而其黨惡匪夥如莊大田等亦斷不肯甘心屈服自必爭為雄長自相戕害其勢必至內潰從前朱一貴佔據臺灣後即有吳姓賊人互相爭鬪之事此即前事之証是林爽文等縱使大肆猖獗臺灣全郡為賊所佔亦無難設法圖之指日授首況此時賊

人佔據要隘我兵前往攻勦在賊匪或得以逸待勞
若賊匪竊據臺灣官兵分路進攻則匪徒四處守禦
其力亦必難支此乃反客為主之勢辦理更不致棘
手福康安寧未算及此乎朕之待福康安不啻如家
人父子恩信實倍尋常福康安亦當以伊父傳恒事
朕之心為心竭力奮勉克紹箕裘並揆度事機驗之
天理人心努力堅定副朕體恤周至宵旰焦勞之意
一力擔當若遇事輒先涉張皇不特朕將何所倚恃

而伊亦將置身何等耶且在京大臣中為朕所倚信
素能辦事者如阿桂久經軍旅但已年逾七旬自難
令其遠涉重洋和坤朝夕扈從在朕前承旨書諭亦
難暫離此外即令福康安自思更有何人堪能勝任
者福康安簡任有年為國家屈指可數之人若伊復
有疑難不能肩此重寄朕又將簡用何人亦斷無為
此小事派福康安前往復令阿桂和坤續往又豈有
朕親征之理乎就目前情形而論福康安屢膺軍旅

聲威素著今領兵前往賊人計大兵必前抵臺灣郡城自亦專注該處以圖抵禦而此處係久經保守駐兵之所可保無虞福康安竟不必前赴府城應帶領巴圖魯侍衛等由蚶江配渡直抵鹿仔港若藍元枚業已前抵諸羅援應福康安即接續前進在後督率會合攻勦如藍元枚尚未前往福康安即當會同藍元枚并檄知徐鼎士或竟前赴大里杙賊巢夾攻乘虛直搗俾賊人聞知自必回顧巢穴眷屬則諸羅之

圍可不攻而自解而南路賊匪亦必聞風驚潰紛紛解散此為聲東擊西之計使其首尾不能相應必成擒矣福康安務須安心鎮定出奇制勝勉圖奏捷

上又命軍機大臣傳諭孫士毅李侍堯曰調派臺灣兵丁所需棉衣等物其借給工料銀兩原應照例歸款但該兵丁等調赴軍營如果能奮勇出力將逆匪即行勦滅迅速藏功則借支款項即加恩賞給免其扣還亦無不可著孫士毅李侍堯即將此旨宣諭各兵

丁等俾感激歡欣倍加踴躍

同日李侍堯奏言閩省增募新兵今據各營具報已募得一萬有餘其餘尚在廣為招募查各處情形亦有不同如南澳左營派募四百名現僅募得二三十名經臣嚴行申飭令其速為召募尚未據報其上游延建一帶亦祇兵家子弟應募而民人入伍者甚少是各鎮協營不能預定額數均勻配募只可於易募之處多增新兵以備應用閩省惟

泉漳二府民皆好勇尚氣情願入伍者多且調發赴臺亦最近便自應於此二府多行召募但細加體訪漳州民情究不可信緣泉漳久分氣類現在逆匪林爽文莊大田等俱係漳籍是以臺地漳人多為賊所誘脅而拒賊者皆係泉人內地聲息相通泉民聞募兵殺漳人尚俱踴躍若募漳人往勦勢必不能得力且漳人入募難保無會匪混入其中而既令食糧將來事定後或須量加裁減更有

難於辦理之處通盤計算與其多募漳兵自不如
多募泉兵是以臣所募兵內漳州所屬僅照藍元
枚所指營分共募兵一千其餘多在泉州及金門
廈門等處招募至兵數既增則軍械尤須多備烏
鎗一項臣前查奏內地各營遺失及不適用者七
千餘桿又因上年臺匪猝擾及本年鳳山失事約
畧共損失三四千桿現已動項於福州福寧泉州
漳州廈門分設五局派文員會同營員上緊製補

一萬桿今新募多兵每一兵即須一械就現募兵數又須添製鳥鎗六七千桿刀鎗藤牌二三千件一併嚴飭各局晝夜趕造計兩月內俱可齊全餘俟續募得兵若干一面配製亦可應手至所募新兵現將舊兵鎗械通融應用使之早為演習俟新製鎗械齊備則各兵技藝亦可嫻熟得用再軍營各兵自應預籌禦寒之具臣已飭藩司即於軍需項內動支分交各營趕緊製備除舊派戍兵本係

駐防業有貯備無庸給予其續派之征兵應各製給長袖布厚棉馬褂一件單布套褲一雙搭船解往所用工料價銀統俟凱旋後於各該兵丁月餉銀內寬以月日陸續扣除歸款奏入報

聞

欽定平定臺灣紀畧卷三十三

欽定四庫全書

史部

欽定平定臺灣紀畧卷三十五

內閣中書_臣沈鵬覆勘

武英殿纂修中書_臣彭元琬

欽定四庫全書

欽定平定臺灣紀畧卷三十四

八月二十六日

辛酉

上命軍機大臣傳諭福康安李侍堯曰臺灣勦捕賊匪
自常青接辦後續調常兵不為不多因常青零星派
撥以致郡城存營之兵止有四千不敷策應其實添
派浙粵滿漢官兵迄有三萬兵力已為厚集乃福
康安於途次一見常青之摺遽為所惑是以未即准

行今再四思維福康安受朕深恩委以軍旅重寄伊
並非不曉事之人於調度機宜豈有不悉心籌畫何
至畏難若此推原其意自因於途次接閱常青等奏
報情勢甚急迫而伊前抵廈門尚需時日若俟到
彼後該處有不得不添兵之勢臨期再行奏請調撥
恐致緩不濟急是以預為奏請朕歷念軍務宵旰靡
寧豈不知厚集多兵可以迅速完事如果揆度情形
事在難已寧於伊等所請或有靳而不予者此亦福

康安所深悉今既委福康安以勦賊之任而福康安
有必須添兵之請若故違其意恐伊以兵力不給遇
事不能卓有定見轉屬無益且朕於福康安恩遇周
渥無不曲加體恤豈忍置伊於險地而轉於林爽丈
莊大田有所姑息而不欲福康安之速行勦賊無遺
耶今已令保成李慶榮等速將脩調黔省兵二千令
許世亨帶領速行赴閩聽候調用至湖廣兵不能如
黔省之得力且遠隔數省道里紆回此時亦可無須

紛紛遠調福康安既有屯練兵二千又得此黔省兵力是此四千勁兵可抵他省四萬加以節次續調之兵軍威已屬壯盛福康安亦可安心鎮靜堅持定見力圖奏績不必再存畏難怯懦之見若有此多兵福康安猶不能無所畏怯則各省之兵皆可紛紛檄調惟任福康安所為而已朕亦聽之想福康安斷不肯如此進退無據也現在柴大紀處雖被賊人圍困然柴大紀素能激勵將士圍守數月未必竟至不支而

常青現已派委蔡攀龍帶兵前往援應蔡攀龍亦奮
勇可恃非魏大斌等可比看來或竟能破賊解圍而
常青藍元枚屢經諭令前赴諸羅此時會合一處亦
未可定若日內得有捷音聲勢聯絡軍威振作則黔
省之兵即可停止進發以免擾累

上又命軍機大臣傳諭福康安常青李侍堯藍元枚曰
常青接到柴大紀等被圍緊急復派副將蔡攀龍帶
兵一千六百名前往策應因思此事常青既未親自

統兵往救諸羅若於前次柴大紀請救時即派蔡攀龍帶兵前往該副將素能奮勇為賊所憚或能將賊匪痛加勦殺打通前路所運糧餉火藥等項自不致被賊截斷乃常青計不出此僅派魏大斌前往接應魏大斌係浙省派令帶兵之員並非奮勇可恃以致在鹿仔草遇賊僅帶兵數百名前抵諸羅是常青於此事委派非人實屬錯謬至蔡攀龍自到臺灣屢次奮勇殺賊著有勞績甚屬可嘉所有海壇鎮總兵員

缺前經李侍堯奏明令副將李長庚署理今即著蔡攀龍補授以示獎勵並著常青傳諭蔡攀龍令其加倍奮勉現在帶兵援應諸羅務將府城抵諸羅一帶屯聚賊匪悉力勦除廓清道路使糧餉火藥隨同官兵運送接濟無若魏大斌之被賊邀截不能兼顧致諸羅城中又添蔡攀龍所帶官兵吃用之費再賊匪狡黠若蔡攀龍領兵前往未必不又施誑誘魏大斌之計讓出道路俟官兵過後復又邀截蔡攀龍勿為

所惑當探知賊匪潛匿處所往前搜勦方能痛掃無遺廓清道路此為最要常青處現存之兵新到者雖止有四千而其餘浙粵等處官兵亦經陸續配渡自早已全抵該處常青何得藉口兵單一味株守並不往北進勦況即以常青所請添調之兵而論如江西廣西兵在綠營中最为無用朕所素知今復思此二省中武備如果可觀當必有游擢至專閫大員者因將兵部所進提督總兵名單詳加披閱則現在提鎮

中竟無一籍隸江西廣西者可見該二省武藝技勇
實係平常常青即欲添兵亦應將黔楚之兵奏請添
調若江西廣西之兵法懦無用倘派令前往不免顧
戀家室心懸兩地徒以輕試賊鋒豈能勦捕得力常
青身為大員而於江西廣西兵之平常無用亦不能
知悉尚得謂之留心武備者乎再昨據孫士毅奏聞
賊匪糾集亡命奸徒潛伏林莽衝犯我兵必須鎗手
後緊接短兵如賊匪已在百步之內即令短兵直前

撲殺等語賊人鬼域伎倆狡詐百出其所畏憚者係官兵鎗砲正可用以殺賊乃綠營習氣竟有未見賊匪即行施放鎗砲及賊匪猝然衝犯轉致措手不及徒有鎗砲不能得力最為可惡着常青藍元枚等嚴加訓飭或即照孫士毅所奏於鎗手後緊接短兵若賊匪相距較遠不可令其亂施鎗砲將鉛丸火藥虛擲無用之地待賊匪近前即用短兵撲殺毋令賊匪得逞狡計

同日孫士毅奏言接將軍常青來札稱現在又請

添調廣西兵三千名以資勦捕等語

臣

前因臺灣

逆匪未靖恐軍營或有續調曾預備粵西兵三千

名密札廣西撫提二

臣

預行挑撥停妥茲已飛咨

廣西撫

臣

孫永清提

臣

三德即將預備三千名飭

令將脩分帶即日起行復令於各兵隨身携帶火

藥之外再脩三萬觔解赴閩省應用又正在拜摺

間接閱將軍常青摺稿知諸羅賊匪勢尚猖獗提

臣柴大紀又有添兵之請萬一接應稍遲關係不小何敢因粵東附近海口各營抽調已多不復再為酌撥應請於撫標廣協等營再湊足一千名飭令將備速即帶領來潮以備赴臺策應一面飛咨軍營俟常青等咨覆現須徵調即於粵西征兵未到之前先令此一千飛速前進奏入

上命軍機大臣傳諭福康安常青李侍堯孫士毅何裕城曰添調浙粵二省官兵軍勢已屬壯盛又何必遠

調廣西江西之兵乃常青率行咨調實為毫無主見
今已據孫士毅會咨廣西令孫永清等派委將弁帶
領起程祇可准其調往至常青於前次具奏之後即
已咨調廣西官兵其江西省之兵諒亦已行文徵調
江西兵較廣西更為平常且此時添調之兵不為不
多斷可無庸派往著傳諭何裕城如常青已經撤調
該撫辦理尚未起程即可停止如業經派撥起程行
抵何處即於何處撤回無庸前進常青此番冒昧調

兵原託名救應諸羅試思此兵當兩三月方到諸羅
尚可待乎朕令常青藍元枚等就近速帶大兵往救
諸羅至今尚未奏起身之期尚欲待廣西江西無用
之兵於兩三月後救諸羅是誠何意見著常青明白
回奏至孫穀於撫標等營湊足一千名名調赴潮州
預備增調未免過於急公粵東節次派調之兵已及
萬餘該省亦係海疆重地若派撥過多恐不足以資
彈壓孫士毅所請預備之兵一千名竟當停止毋庸

再行撥調

上又命軍機大臣傳諭保寧李慶榮曰臺灣尚須添兵
協勤著保寧李慶榮即將挑備兵二千名派戚寧鎮
總兵許世亨為總統帶領速行分起前進由廣西廣
東行走迅抵閩省聽候福康安調用所有軍裝火藥
等項俱著妥協備帶勿致稍有缺乏

二十七日

壬戌

上命軍機大臣傳諭福康安常青李侍堯藍元枚柴大

紀曰魏大斌帶兵二千七百名前赴諸羅援應而所傷官兵至一千一百名之多雖據該鎮稟報因賊衆二萬餘人猝至又適遇大雨不能施放鎗砲彼此鏖戰以致傷失官兵甚多但綠營兵丁素為懦怯往往遇賊即行奔潰此項損失之兵是否俱係陣亡有無潰散從賊之處常青摺內並未聲叙明晰福康安到彼應即詳細查明辦理並著常青遇便查明覆奏又常青前摺內稱諸羅被賊圍困軍營兵力不足懇於

江西廣西兩省各撥兵三千名等語是常青所請添兵之處係屬候旨定奪乃昨據孫士毅奏稱八月初十接常青札會添調廣西兵丁業經知會如數撥調常青身為將軍如遇有緊急實在兵力不敷原可自行檄調但應一面檄調一面據實具奏乃常青前摺止稱懇請添兵而於已經札知粵省省之處摺內並未聲叙即此可見其遇事糊塗漫無主見再前摺內稱附近民人漸次歸莊已召募壯丁充伍者百餘人並

聞尚有賊目來投等語賊目究係何人其八月十五日續發之摺於賊目有無自行投到之處並無一語提及何以疎忽若此亦著一併據實覆奏至諸羅被賊攻圍緊急柴大紀督率兵民竭力捍禦甚屬奮勉業經常青派令蔡攀龍帶兵往援常青藍元枚亦必遵旨星速統兵前往接應蔡攀龍素為奮勇又有常青藍元枚兩路策應自當破賊解圍會兵一處萬一賊匪猖獗援應之兵未能會合諸羅糧食匱乏火藥

不給實有難支之勢則柴大紀當酌量情形竟率領
兵民出城力戰將賊匪乘勢勦殺突圍而出不可拘
泥城存與存城亡與亡之見固守勿去致有意外之
虞既於體統有傷且轉足以長賊人之氣於事無益
柴大紀務須審度機宜完師整旅方為兩全此旨著
交常青藍元枚酌量何路前赴諸羅為便即差妥幹
弁兵護送迅速遞投務期必達毋致中途遺失轉為
賊人所得方為妥善

二十九日

甲子

富綱奏言與撫提二

臣

於各營脩戰

兵內酌量挑撥二千名每兵百名派烏鎗兵七十
名砲兵二十名弓箭十名其應帶火藥從前出師
金川每鎗砲兵一名酌帶火藥十一觔四兩黔省
各營額貯藥觔數甚充裕且由古州水路而下携
帶亦便今酌定每兵加倍配帶火藥二十二觔八
兩俾資充脩其餘軍械等項悉照例配帶大定協
副將岱德人甚明幹勇往曾出師滇川經歷行陣

臣即派為統領又長寨營叅將札郎阿清江協遊擊魯安邦遵義協都司楊廷邦古州鎮都司朱化英貴陽守備劉廷奇提標守備羅世德等六員均係才具幹練曾經出師酌派分起帶領至此官兵二千名擬分作四起行走再查黔兵赴閩應由古州乘船於丙妹地方出境至廣西懷遠縣所屬之梅寨地方交替應於梅寨預備小船接載至懷遠始換大船前進臣思與其於梅寨交替換船不免

馳延不如即以黔省古州乘坐之船順流而下直
送粵西懷遠再行換船前進在黔省不甚費力而
廣西又省脩船交替之繁且於兵行更可迅速所
有沿站應需夫船及供應等項臣現在密飭藩司
就各營經由處所酌量安設尖宿各站飭各該地
方官妥為預脩毋致臨時遺悞奏入報

聞

九月初二日

丙寅

李侍堯奏言粵省最後之綠營兵

一千五百名并續調之一千名陸續於本月十三日全行來厦配渡緣旬日以來東南風大不能放洋所有滿漢兵船一齊停泊茲於十六日晚間風勢稍平俱已開駕滿兵向鹿耳門進發係派往常青軍前九千數內所有閩兵二千粵兵四千早已前往茲更得此滿兵三千兵力自益壯盛其粵省綠營兵二千五百係派往藍元枚軍前五千數內緣先到之粵兵五百及漢兵二千已於前月下旬

開洋今續到之粵兵二千五百適總兵李化龍抵厦即令統領向鹿仔港進發又有本省兵三千名係臣因諸羅望援甚殷奏明即於泉州等處就近挑撥新舊兵徑往鹽水港援勦緣三千兵必須大員統領已飛調建寧鎮總兵鄭國卿前來而路遠尚未即到先令遊擊張元咎等帶領前往囑其到鹽水港時即與駐劄該處之遊擊楊起麟商度事機奮勇進兵勿得稍有觀望俟鄭國卿到厦門亦

即令其星夜趕往其省城所派一千兵由五虎門
往北淡水者風勢大概相同想亦同時開駕至浙
省撥運軍米共十六萬石已經全抵泉廈兩倉盤
收清楚其江西所運之米由五福起早已抵光澤
水口者七萬餘石轉運至省亦已有三萬餘石江
蘇之米亦已有五千餘石運抵廈門是米糧一項
總可源源接濟惟諸羅近日情形尚未得各官稟
報俟一得信息即行馳奏再察看北淡水情形地

在臺灣極北不過林小文賴樹等小賊糾夥不多
勢不能敵衆寡之衆是以林小文等遂先後被官
兵義民拏獲昨訊據自賊中逃出渡回之陳班供
稱被賊何檜捉去派在何馬寮內守更內不過四
五十人三貂地方尚有賊目吳沙本年四月官兵
焚燬何檜賊寮何檜已逃往吳沙處等語而何馬
一犯近亦經署把總王福等拏獲是北淡水惟吳
沙何檜二賊逃竄未獲此外已無賊匪其所謂難

民者臣細加查訪並叅閱各官稟報大抵多係漳人泉粵之人因其與賊同鄉遂不分皂白從而搶殺以致避難白石湖金包裹等處今既陸續招撫歸業補種田禾並據該地文武等官出示曉諭衆粵民人不得再有戕害是北淡水地方現已寧貼無事至徐鼎士已移駐大甲該處係淡水南境與彰化接界昨據該副將同知等稟稱林爽文方急攻諸羅未暇歸巢懇內地撥兵一二千來即可自

大甲過溪攻大里找之背等語

臣

查該副將處現

據報有兵一千八百名又有食糧義民義番七千

名自備口糧義民一千餘名隨批令該將等既有

兵民幾及一萬應即乘機進攻勿稍觀望適令

臣

撥兵一千即由五虎門前往接濟隨於督撫標及

水師營福州城守挑派兵一千名即由省城出五

虎門放洋並札撫

臣

徐嗣曾就近料理起程已於

初四日登舟至五虎門候風今廈門各兵船於十

六日晚間放洋想五虎門之船亦必同時開駕再
閩省辦理兵差運送軍械等項除海運外皆係陸
路踰山越嶺向無車馬惟恃僱募人夫緣平日另
有一種江西及本省進食之人專以受僱充夫為
業故農民各安田畝不知有應差之事即遇重大
差使農民習以為常謂各站自有充夫之人於民
間無與是以州縣遇有差務俱係現僱人夫應用
從不能派及里下非如陝甘雲貴等省可以按田

派夫使之領價應役而此等專以充夫為業之人
每值差務緊急輒一名索數名之價否則不肯就
道地方官惟恐悞差不得不曲徇其意增給價值
此閩省實在情形也臺灣近日僱夫尤為可異府
城外鄉民冲散已無可僱即間有可僱不能無疑
惟恃府城內慣用之人僱募應用既資其力又免
使去而為匪是以每名僱價二百四十文臣以夫
價過多於臬司李永祺前往時囑令留心查察今

閩省內地既無按田派夫之例惟有仰懇量增催價使人樂於受催則雖素不充夫之人亦皆踴躍趨事查軍需則例夫價條內口內每站給價銀五分米一升口外每站銀八分米一升口內每站以七十里為率口外以四十里為率又註明金川例正價之外加給回空口糧折銀口內五分口外八分係奉

恩旨加給未便纂為成例如果需用緊急正價不敷承

辦大臣臨時酌核奏明辦理等語是正價之外如有不敷原得隨時奏請今可否閩省內地催夫照金川口內之例正價五分口糧一升之外加給回空糧銀五分臺地催夫照金川口外之例正價八分口糧一升之外加給回空糧銀八分設再有不敷俟事定後另於通省官員通融攤捐歸款其內外每站里數另行咨部存案其海運催船水脚臣前奏明海水無順逆即以順風抵順水之價按照

軍需則例順水每石每站三分六釐而守候回空
俱不另支口糧其別項差使往來者就船之大小
可載若干石之數計算原擬暫時應用不日即可
竣事是以守候回空雖不另給口糧本港各船戶
已皆樂從今增兵添餉用船正多兼須催覓外省
來船方足敷用守候聽差難以尅定時日而回空
時臺地已無貨可載又不能另得水脚則事前之
守候事後之回空均須按照舵水人數給以口糧

方不致苦累但不定以限制又恐開浮冒之端應請守候口糧以二十日為率回空口糧以十日為率再海船全以淡水為要通海港汊皆係鹹水必須向居民購買井泉貯入水櫃以供日用而沿海地方井既不多每滿一櫃輒取錢十餘千所有載兵之船或有守風稽擱時日需水更多應請每載兵一名另給船戶買水錢一百五十文其不載兵之船不得援以為例再前據臺灣府楊廷樺詳稱

庫項已經前守孫景燧墊用無存現在兵餉無項
可支請先行酌撥臣隨批飭將所墊何項係何員
任內墊用是否墊用軍需抑係孫景燧侵虧查明
以憑叅奏分別追賠一面將應放官兵俸餉銀十
萬二千五百兩先由藩庫撥解以應支放並將孫
景燧墊用各項逐一查核府庫應存銀十六萬一
千一百餘兩除現貯在庫並墊項內有已經扣還
及雖未扣還尚有項可扣可追各款抵算外其餘

已墊作兵餉尚未收還之十萬九千九百餘兩皆
係臺屬各廳縣應解之項又代墊鹽販欠課九千
三百餘兩係各鹽販應繳之項府倉應存穀十六
萬七千七百餘石除現存穀二萬九千四百餘石
又交過穀價外實在無著穀十二萬五千六百餘
石亦係各廳縣應買補解府及各殷戶已領過價
值並歷任留交應補之項皆因上年賊匪滋擾各
廳縣倉庫有遭搶毀即領過穀價之各殷戶及欠

課之各鹽販亦未知存亡以致倉庫俱無著落但錢糧倉穀既係應行解府之項自應按期催解以歸實貯乃該故守於各廳縣應解之項並不及早嚴催遇有官兵俸餉轉將倉庫舊貯之銀穀挪移墊用而各該廳縣於應行解府之項亦並不按期批解迨上年冬間賊擾後則盡歸於無著明係平日已經虧空上下扶同作弊挪前補後致應行實貯之倉庫散失無存自應嚴辦孫景燧原籍現據浙

撫臣琅玕查抄其家屬尚在閩省僑寓除札會撫
臣徐嗣曾等在省城泉州等處速行查明下落將
貲財盡行查封毋稍隱漏外其應解不解之各廳
縣一併飛咨各原籍查抄以便變抵歸款奏入

上命軍機大臣傳諭福康安常青李侍堯藍元枚曰此
時正在勦捕賊匪之際該督惟應將調度策應一切
緊要機宜悉心籌畫及將有官軍打仗殺賊信息隨
時具奏至此鎖細之事並非目前急務該督察看情

形遇有應行調辦者不妨權其輕重次第辦理何暇
於此時鯁鯁過計瑣屑入告該省之意不過以此等
無著庫項及增催價值關係將來報銷惟恐不預行
奏明致伊有賠累之事殊不思臺灣逆匪茲事皆由
前任督撫及地方官侵貪歛怨廢弛貽誤所致李侍
堯係接任辦理軍務之人將來事定後其浮用無著
款項有應行賠補者自當於歷任督撫及該地方官
名下查明在任年月著落分賠必不令接辦之李侍

堯有所賠累也其摺內所奏各款現在實無暇計及
此姑照所請行李侍堯當明諭朕意安心籌辦軍務
要件其尋常細事無庸過慮預為將來地步也至常
青藍元枚旬餘以來未據續有奏報而柴大紀在諸
羅被賊攻圍曾否打仗得勝勦散賊匪日內總無信
息殊為煩悶現據李侍堯奏調赴常青之閩粵兵早
經前往滿兵現已配渡開洋藍元枚處應調之粵兵
漳兵已於七月下旬開渡其續調之粵兵現已令李

化龍統領向鹿仔港進發是常青藍元枚兩路兵力俱已厚集正當乘其新到銳氣奮勇直前併力進剿況徐昂士在大甲駐劄招撫難民義番食糧充伍者甚多又經李侍堯派兵一千名前往接濟此一路亦可牽制賊匪令其首尾不能相顧若賊匪回顧家屬則諸羅之圍自解常青藍元枚尤當趁此機會迅速帶兵直抵諸羅與柴大紀會合進搗賊巢以收掃穴擒渠之效

同日浦霖奏言湖南撥運兵米十萬石於改由陸
運之後即已飛咨何裕城妥為籌辦隨據覆彼地
接運之所據經泆有專員不致遲悞除領運米二
萬五千石已於八月十五日開幫其餘陸續趙運
魚貫踵行總使湖南之米緊隨北省尾幫之後不
許遠離自無虞遲悞奏入報

聞

初三日丁卯保寧奏言調泆屯練降番二千名赴闕

一切夫馬船隻供應等項俱預脩經理茲於八月十九日晚頭起屯練兵五百名到省臣保寧會同將軍臣鄂輝提督臣德成親加點驗俱屬精壯勇健當即曉諭鼓勵令其安靜行走奮勇出力該番等俱踴躍遵奉查番練原無軍裝今涉遠赴閩軍容宜整臣與各司道預為捐製毡帽得勝卦並衫袴等二千副按名散給各屯員亦賞紬緞荷包等物並於例支口糧之外俱各賞給牛羊糴粃烟茶等

物以壯行色其二三四起番練俱一例辦給至番練等所帶鳥鎗刀矛器械俱屬齊全惟火藥一項水路長途不特有費搬運且舟中星火宜慎現飭毋容隨帶仍咨明閩省俟該官兵到日發給其管領將弁除本管維州懋功二協副將各選派幹練都司千總外委等官並酌帶字識通事目兵以資分領所有頭起官兵支領俸餉行裝銀兩及犒賞屯練衣物等料理完畢即令維州協副將那蘇圖

管領於八月二十日登舟二十一日早開行月內
可抵重慶其餘二三起七練俱即隨後進發雖新
疆降番較七練稍速月內亦必能催趙到省接續
起程不致間斷其自省至重慶自重慶至夔州之
巫山縣出境派委各府州應付俱於例給口糧柴
舫之外酌賞鹽茶蔬肉以供日食并令隨到隨應
俾免逐程停泊稽延至重慶所需船隻已飭川東
道黃軒知府趙由坤備辦倘兵至之日尚有不敷

即照前奏將雇備續運米三十萬石尾幫船隻先儘兵行不致遲滯再行江險灘甚多兵番等均可於過灘時上岸行走不過一二里仍即下船已派重慶鎮道多派兵役及紅哨等船小心護送再川省現在辦運閩米正當秋令水平下游商販貨船來川者較多總須至重慶卸載臣前奏催令速赴重慶原無碍於商載至宜昌荊州雇辦空船旋因客船陸續趕到可敷應用當即飛行荊宜二府停

止現續辦米三十萬石之頭二兩運已自重慶開
行其官兵番練所需船隻業飭將催脩米船尾幫
先儘兵行隨後再辦運米約於九月中旬亦可蒞
事其時正值秋收甫畢之後商販米糧仍得船載
流通並無妨碍奏入報

聞

初四日戊辰孫士毅奏言貴州兵赴閩必須經由廣

西東境內臣密飭兩省地方官酌雇船隻碾脩口

糧諸凡妥協經理俟黔兵隨到隨即應付俾得迅速通行查黔兵自古州一帶舟行入廣西境經柳潯二府直達梧州復由梧州入廣東境俱係順流而下行程最捷再從廣東省河換船至惠州老隆過山仍從青溪下船直抵潮屬黃岡起岸即日赴閩除粵西經過地方移至撫臣孫永清酌派文員妥為辦理其標營武職由臣檄飭沿途彈壓以期安靜至粵東經由驛站稽查照料現已辦有章程

自可通行無阻其自入廣東境至惠州府撫

臣圖

薩布督查其自惠州至老隆過山提

臣

高臻督查

其自青溪下船至潮屬黃岡起岸由

臣

督查點送

出境總令軍行肅靜不致稍有張皇擾累又前接

將軍常青請調粵西江西兩省官兵之信即一面

檄令粵西官兵分起前進八月十一日復接常青

寄閱摺稿內有諸羅急需應接等語

臣

以粵西兵

丁雖經檄調緩不濟急

臣

既知軍營需兵接應豈

容膜視是以復就粵東撫標廣協惠協等營湊調
一千名派令將備速帶來潮前赴諸羅協同搜剿
今奉

旨令湖南湖北貴州各挑兵二千名聽候調遣自應將
粵東西續調兵四千名暫停但詳閱常青等摺內
情形賊匪勢尚猖獗我兵似有不敷今調楚黔兵
六千名若再加兩廣兵四千名共又得生力兵一
萬則福康安到彼足資調度剿匪自較多力臣是

以擬候添調粵兵一千名到潮仍令速赴諸羅接應其粵西兵三千亦未敢遽行停止奏入

上命軍機大臣傳諭李侍堯孫士毅曰臺灣勦捕賊匪節經派調閩省浙粵滿漢官兵及四川屯練黔省兵前往會勦兵力實已厚集乃常青因諸羅被圍緊急續行咨調廣西兵三千名因前據孫士毅奏業已咨會廣西派委將弁帶領起程是以准其調撥其孫士毅所請預備之廣東兵一千名業經有旨停止想該

督接到前旨自必遵照辦理在孫士毅以隣省總督
接到該將軍等札會自不能不預為籌備但現在官
軍雲集又經特派福康安及海蘭察等帶領已圖
魯侍衛等前往督勦大兵所臨勢如摧枯拉朽賊匪
等鬼域伎窮諒不能久延殘喘該督等惟當籌度機
宜鎮靜料理俾內地民人安心寧謐方為妥善

同日琅玕奏言拏獲派往臺灣出征之駐防逃兵
福常一名訊係中途因病潛逃畏縮藐法當即將

該犯正法奏入

上命軍機大臣傳諭寶琳琅玕曰福常係滿州駐防既經派令出征即應奮勇爭先力圖自效乃敢中途藉病潛逃實屬可惡該將軍等即將該犯正法尚為辦理得當至該犯之父平時漫無管教致有此等不肖之子亦不可不查明辦理以示懲警著寶琳等即查福常之父如係有職弁員即當斥革該犯之子如現在食糧當差亦即一併革去或念滿州駐防革退錢

糧家屬無可資以養贍亦應俟該犯子孫一二代後
再行挑食錢糧方足以昭懲創至弟兄非父子可比
自可無庸查辦也

欽定平定臺灣紀畧卷三十四